

# «Vusch dal Grischun e da la musica mundiala»

La regenza grischuna ha surdà il Premi grischun da cultura e divers premis da renconuschientscha e da promoziun

■ (cc) La regenza surdat il Premi grischun da cultura 2018 a Corin Curschellas. La musicista da Rueun è chantadura, cumponista, perscrutadora, leadra d'ina band, actura e promotura. Corin Curschellas è ina gronda vusch dal Grischun e da la musica mundiala. Il premi è dotà cun 30 000 francs. Corin Curschellas chanta, ella suna clavazin, dulcimer, citra, armonium indic, percussiun, accordeon e synthesizer. Ella cumpona per Michael von der Heide, Vera Kaa, Dodo Hug e Stina Werenfels. Ultra da quai è Curschellas ina vaira archeologa da musica: ella s'occupa cun la chanzun populara rumantscha. Ella arranscha ed interpretescha da nov veglias chanzuns rumantschas. Ella è en gronda furma cur ch'ella sveglia e dat vita en moda drammatica, trista, garmadia e plain temperament a las chanzuns ch'èn idas en emblidanza. Sper sias atgnas pre-

staziuns artisticas è Curschellas er promotura da cultura ed intermediadra d'art sco scolasta da musica a Glion. U ella envida cun «corin invit» a concerts, prelecziuns e teater en il Cinema Sil Plaz, savens ensemen cun reschissuras, acturs, scenarists. A Türitg tutga ella tar las organisaturas da «Volksmusik im Volkshus».

L'operar da Curschellas enritgescha la vita culturala en Surselva, en il chantun Grischun, en Svizra ed en il mund. Il chantun Grischun ha promovì in pèr da ses projects, la regenza l'ha undrada l'onn 2010 cun in Premi da renconuschientscha. L'artista ha cumplenì l'onn passà 61 onns. Ella ha deditgà sia vita e sia forza a l'art. Cun in stgazi prezius e multifar sco resultat. Quai merita il Premi grischun da cultura 2018. Ils premis vegnan surdads en il rom d'ina festa che ha lieu venderdi, ils 15 da zercladur 2018 en la baselgia da la claustra da Glion.



Corin Curschellas, la portadora dal Premi grischun da cultura 2018.

FOTO S. HLAVACEK